

光緒山西通志

山右金石記

通志單行本

目錄

卷一

銅器

鐵器

貨泉

卷二

碑碣

漢魏北齊北周隋後魏

卷三

碑碣

唐武德至景龍

卷四

碑碣

唐先天至永貞

卷五

碑碣

唐 元和至天佑
五代後唐 晉 漢 周 北漢

卷六

碑碣

宋

卷七

碑碣

遼 金

卷八

碑碣

元

卷九

摩崖

幢柱

石題

造像

法帖

磚瓦

卷十

補遺

凡金刻一百三十八石刻一千五百二十四

校契通志次及金石擬同經籍祇標名目而別輯專書與之並行草創未半自嫌其略且念一家著述難臻賅備博訪旁搜大需時日而官書鈔撮爲能門類既多詳略互見正不容執一例以爲定也乃復錄及跋尾間得打本亦加考證閱旬十四成書九卷迫於剞劂諸多漏列統爲補遺一卷其有同志續寄新拓

得隨時編入焉刻既成索觀者眾遂先印行署曰山
右金石記用播藝苑以廣墨緣云

金石記十

記五之十 山西通志弟九十八

賜進士出身頭品頂戴兵部侍郎兼都察院右副都御史巡撫山西提督軍務臣張煦奉
旨監修

補遺

銅器
石題

鐵器
造像

碑碣
法帖

摩崖
磚瓦

幢柱

周杜蕢解銘

壽陽祁氏藏器 篆書

徵執亭詩集注道光初年賜器也解底亞文中有古篆武
進李願慰堂釋其文曰杜蕢撰寶解山房記

謹案左傳晉膳宰屠蒯禮檀弓作杜蕢

漢汾陰鼎銘

器久失所在 篆書

虞荔鼎錄漢元鼎元年汾陰得寶鼎卽吾邱壽王所識之

鼎高一丈二尺受十二石雜金銀銅錫爲之四面蛟龍兩耳能鳴三足馬蹄刻山雲奇怪之象紀靈圖未然之狀其文曰壽考天地百祥臻侍山伏其靈海伏其異此銘在底下又別有銘或浮或沈皆古文複篆上古之鑄造也

謹案銘辭不類三代當是後人刻之鼎底者其所云又別有銘皆古文複篆者必在鼎腹乃原銘也考漢書汾陰得鼎並無款識故吾邱壽王謂爲漢鼎非周鼎以迎台時事非真識也然唐韋續言小篆周時所作漢武帝得汾陰鼎卽其文皆與史異必有所本

晉旌陽令許遜劍銘

太原武氏舊藏 篆書

廣異記唐開元末太原武勝之爲宣州司士知靜江事忽

於灘中見雷公踐微雲逐小黃蛇盤繞灘上靜江夫役戲
投以石中蛇鏗然作金聲雷公乃飛去使人往視得一銅
劍上有篆許旌陽斬蛟第三劍云

後晉靈泉寺銅鐘記

今在陽城縣西北四十里劉村

澤州府志門山僧洪密所遺鐘以銅鑄銘記後晉開福
年其形橢而不圓案晉惟天福開運二號志未見其器
蓋仿古鑄造或卽
就古鐘鑄記俟訪

宋汾陰銅節字

大中祥符三年 篆書

玉海汾陰銅節篇熙十年請事愿獲吳璿以獻於朝其文
曰皇帝車駕奉祀汾陰之寶詔藏天章閣下工部考覈乃

銅也

右銅器

隋安邑古鐵板銘

開皇元年 八分書

隋書五行志安邑掘地得古鐵板文曰皇始天年資揚鍾壽

宋天聖鐘識

天聖二年三月 正書今在祁縣治燕樓上見縣志

宋嘉祐鐘識

嘉祐三年四月 今在岳陽縣城北門樓上見山石金石

存略

宋崇甯鐘識

崇甯五年 今在沁水縣城東門樓上

宋大覺寺鐘識

元祐七年九月 今在岳陽縣南二里寺中

宋洪慶觀鐘識

政和二年 今在垣曲縣南洪慶觀

宋政和鐘識

政和三年三月 今在翼城縣十方院並見金石存略

馬莊武王祠鐵人題字

今在猗氏縣北門內馬燧廟

猗氏縣志廟中金人二一宋政和三年造一金天會十
五年造俱高四尺許

金崇福院鐘識

天會十二年 今在沁州治熙樓上

沁州志鐘高六尺圍丈餘本崇福院物列街有左監門衛大將軍知沁州軍州事李興仁同知沁州軍事判官田說知銅鞮縣事劉常知武鄉縣事李輔金知沁源縣事王浮知綿上縣事劉元寄銅鞮縣權主簿郭諫

金天眷鐵醺盆識

天眷元年五月 今在萬泉縣泰山廟見金石存略

金東嶽廟鐵醺盆識

皇統元年 正書今在隰州

隰州志盆題鎮國上將軍南隰州刺史趙寬名下座爲明天順時知州趙寬所鑄先後數百年同官同名共成一器亦奇

金顯慶寺鐘識

皇統七年 今在汾陽縣北十里劉村見金石存略

金貞元鐘識

貞元三年 今在潞城縣城隍廟

金正隆鐘識

正隆六年 今在浮山縣儒學

金大遼寺鐘識

大定五年 今在徐溝縣

金大定鐘識

大定六年 今在翼城縣城內鐘樓

金聖母廟鐘識

大定二十年二月 今在浮山縣城內

金大定鐵獅題字

大定二十四年 今在平陽府關廟儀門外並見存略

金馬莊武廟鐵醺盆識

大定二十四年 今在猗氏縣

金石存略盆高四尺許圍約八尺文曰大定二十四年二月八日前知大清觀道士李敏修記

金壽陽鐘識

大定中 今在壽陽縣署

徵徠亭詩集注壽陽諺云古城南古城北沒耳金鐘露半壁道光丙申邑侯鍾元甫於縣治前得之乃金大定鐘也

金明昌鐘識

明昌七年 今在平陽府城大中樓

金石存略鐘高丈許圍一丈八尺字多剝蝕惟佛寶二大字及皇圖永固十六字完好

金承安鐘識

承安三年正月 今在萬泉縣城北門樓

元無佞侯廟鐵醺盆識

至元二年 今在臨汾東二十里翟村

元壽平寺鐵獅題字

泰定三年十月 今在臨汾縣高河橋

元至正鐵醺盆識

至正十三年 今在猗氏縣城內關廟並見金石存略

右鐵器

漢文欽碑

元光四年 舊在絳州見通志金石略

別本部有道碑

光緒戊子濟甯州出土今在州學

謹案碑高六尺許文在穿下額篆漢郭有道先生碑
隸法適古一時競傳爲中郎真迹然千里盜碑終是
疑案後乃有言是乾隆中州人李東琪所刻者拓數
本卽埋地中其剝落皆僞爲者上截每字斧痕顯然
魏閔鄉敬侯衛顗碑陰

聞人牟準撰 舊在猗氏縣

謹案楊用修集金石古文有此碑文云敬侯所葬之
先域城惟解梁地卽刳首山對靈足谷當猗口勢高
而趣幽形垣而背阜鑿室而可以蔽藏不墳而所冀

運朽珍琦素白而靡尙衣服隨時而則有故吏述德
於隧前門生紀言於碑後曰季居亭而已治詹嘉在
主而可友據高平之厚地將億秣而永久所著述注
解故訓及文筆處甚多皆已失墜惟注孝經存倉頡
冢碑大篆書在左馮翊利陽亭南道旁及華山下亭
碑增算狀殷叔時碑魏大饗碑羣臣上尊號奏及受
禪石表文並在許繁昌尊號奏鍾元常書受禪表觀
並金針八分書也太祖文帝等臨詔令雜駁議上封
事一百餘條誠子等散在人間及碑石可見樹碑人
郡國縣道姓名共如干敬侯碑不知亡於何時據文
中故吏述德門生記言當是刻於原石之陰者方志
僅舉其地惟解梁四語並墓不能確指所在錄其全

文以存古蹟於魏初諸碑亦頗足資考核也

魏高陽侯母邱與碑

八分書舊在聞喜縣

李嗣真書後品母邱與碑云是索靖書比蔡石經無相假借

謹案與母邱儉之父其故里在縣南邱村儉被皆後先墓並夷碑蓋晉時迫立者

晉安邑令徐君碑

西晉時立見金石錄

後魏并州刺史王坦墓碑

舊在絳州見金石略

北齊佛經殘碑

河清三年 正書今在絳州

山右金石存略光緒十年龍興宮出土爲洪姓所得石缺少半字多剝泐可辨者一百二十二字

隋寶泰寺碑

開皇五年 今在黎城縣西八里刈陵故城

謹案碑爲刈陵縣政新鄉郭伯琛與華川鄉李延壽等爲故襄垣太守造浮圖所立者碑末書弟子劉世達供養文上空五格別刻潞州司馬薛選頌及大浮圖主李買妻申居那肱正書時雜篆隸開皇作閭皇
隋神山石佛碑

開皇二十年 今在陵川縣東二十五里神山頭見續志
唐會善寺貞觀法師碑

貞觀二十一年 釋智宗撰常皋辯書舊在潞安府見山

右碑目

唐蜀王西閣祭酒蕭勝墓志

永徽二年 石今不知所在

唐韓通碑

龍朔元年 舊在浮山縣並見碑目

唐韓啟墓碑

龍朔二年 今在洪洞縣東二十里蜀村見碑目補遺

唐薛貞墓志

龍朔三年 今在太谷縣陽邑鎮見山右金石文鈔

謹案貞字君幹祖荊州錄事父并州祭酒石並缺其名墓在陽邑故城南一百步不知何時出土文中乃

祖乃父冠冕相承爲質爲文並參職位又構疾相侵
藥餌不療沈痼遂固諸語與近年陽邑所出之鄉正
馬憚南溪令孟貞二志一字不異可怪也

唐申德墓志銘

咸亨元年 正書今在祁縣東南十里申村

金石文鈔申君字儒宗文稱祖達任清河縣令而不及父
蓋無爵位也其云改葬上申村卽今申村與下申村相距
數里咸亨至今千有餘年而申氏後裔族處者猶數百家
亦足見安土敦仁風俗之厚也

唐飛騎尉連簡墓誌銘

周天冊萬歲二年 今在襄垣縣西十五里

襄垣縣志石於道光初出土縣令張力卓仍封於墓而

別立碑其上碑略云連簡字隆暨與妻張氏同穴石首
行遷大周故飛騎尉連府君墓誌銘其序十六行銘七
行文沿六朝餘習字兼篆草行三體其載年月日等武
后所製唐武散官飛騎尉秩從六品君以征高麗功得
補斯職序稱六郡良家首膺召募與貞觀十九年克遼
城詔率五陵之勁卒董六郡之良家合卒於永昌元年
實中宗嗣聖六年明年九月武后稱皇帝改元天授國
號周飛騎不及見耳葬於天冊萬歲二年景申一月天
冊萬歲次年卽萬歲通天元年春時尚未改也丙作景
猶避唐諱也武后以十一月爲正故以正月爲一月至
謂連氏系出伯禽是東野之比意當時通姓氏學者多
源流或不謬墓經今一千一百三十七年矣連族環居

衣衾相承徒以譜牒失傳未能紀遠秋塲既滌約與赴
勘地室隱然其上平疇六畝范氏之業屬其公購仍封
誌石並成墳植樹以表之

案州縣有志石出土者
當以張令此舉爲法

同良墓志

咸亨五年 正書今在祁縣見金石文鈔

謹案良字文善文敘先世云祖介休弦歌閭思之苗
裔澤州潞城縣鳴琴閭珍之允胄焉語殊拙澁似是
其遠祖思爲介休令父爲潞城令者然唐潞城並不
屬澤州也

唐慈德寺會真法師紀德碑

垂拱三年 馮內直撰席望海書舊在潞安府見碑目

唐驍騎尉段雍及處士段咸二誌銘

垂拱元年十二月 今在平遙縣見金石文鈔

謹案二石於道光中同時出土據誌雍字德亮其先
雁門人曾祖歡齊并州司馬祖昌隋定州司戶父羅
并州兵曹雍以從征高麗授驍騎尉感字名遠雍從
子也文不著其父名與雍同日葬段村東二里

唐都尉司馬府君殘碑

行書今在文水縣見金石文鈔

謹案碑剝泐僅存百七十餘字名字俱佚賴標題知
爲氏司馬文中有霜戈曉建星劍霄摩太宗文皇帝
親所鑒臨至貞觀之初追惟故事諸語知爲唐初以
武功佐命者書法絕似聖教當是僞周革命以前所
立也

唐大雲寺彌勒重閣碑

有陰

周天授二年 杜澄撰判師古行書今在猗氏縣仁壽寺

謹案碑前標題又有聖德芝草頌一行而以撰書人分繫二行之下爲石刻創見文駢麗書雜行楷多武后新製字漫漶不能成讀碑額有造像陰列施主姓名字亦殘缺撰書人結銜惟杜澄存前校書郎四字

唐揚州長史薛寶積碑

周長壽二年 正書額篆書今在臨晉縣北四十里平宜村

竹垞金金石目錄云寶刻叢編揚州都督府長史薛寶積碑王處撰文林郎王應坦書長壽中立在河中府是碑漫漶過甚惟額書大唐故揚州長府薛府君之碑十二字尙

完好知卽寶積碑無疑

謹案碑僅存上半連額剝泐之餘可辨者約二百字
諸家著錄並列武周長壽時而額題大唐終可疑也
唐棲巖寺詩碣並記

周長安二年 今在蒲州府東南十五里見金石文鈔

謹案碑曾爲趙氏箸錄前刻高宗御製過栖巖寺詩
五言十韻河東縣文林郎韓懷信書後署咸亨三年
十一月八日次刻鳳閣侍郎平章姚崇五言律題爲

過栖巖寺和司直韋元旦韻而以韋詩附之

鈔本有河東道

採訪使張循憲歲臨登棲巖寺五古一首在御製詩前似別一石誤合於此者

後記爲河東

主簿韋元晨撰亦韓懷信書專頌姚崇大略言崇奉
命按視河東鹽池旣畢蒲州刺史李千里約遊棲巖

崇有詩紀遊尹元凱爲書之及崇復命而天后喜賜
以詩崇復有和章元晨以崇學行政事文章爲三絕
又以棲巖名勝元凱名筆合以朝廷之寵遇爲六絕
云云碑中元旦元凱千里唐書並有傳元晨不知爲
元旦昆弟行否崇按視鹽池本傳不載此文亦可備
名臣軼事也

唐宋隴紀德碑

景雲二年 趙棲桐撰殷祈書舊在汾西縣見碑目

唐柏梯寺碑

開元六年十月 徐彥伯撰胡輔之書今在虞鄉縣

金石文鈔徐彥伯唐書有傳神龍元年爲蒲州刺史而卒
於開元二年碑刊於六年故結銜署前蒲州刺史彥伯本

名洪以字行史稱其七歲能文觀是碑信博麗也書人他無所見碑署處士安定胡輔之錄

唐玉京觀碑記

開元十一年 李璿之撰徐浩書舊在絳州見碑目

唐伯夷叔齊碑

開元十三年正月 分書今在永濟縣首陽山

平津讀碑記碑爲邑宰太原王公所建梁昇卿撰文及書銘末有黃鉞不降志五字當是碑中脫文故附於末

唐薛元九碑

開元十四年 李邕撰白羲暉八分書舊在絳州見碑目

唐王禪成造浮圖碑

開元十八年 今在太原縣山右金石錄碑目並箸錄

竹嶋金金石目錄二後有李太白題名

唐彭珍墓誌銘

開元二十一年十一月 行書今在屯留縣

金石存略碑近年出土石少一角銘詞缺十八字彭君諱珍字汝珍曾祖叔齊伏波將軍上黨太守因官子孫於此家焉父亮上柱國皆於史無徵書最粗略其甲申屯縣西北十里高厚句當是甲申下遺葬於二字屯下遺留字

唐甯國寺碑

開元二十二年 沙門崇福撰史鐫書舊在絳州見碑目

唐權奉古謁廟記

開元二十三年 趙傑書舊在潞安府見碑目

唐榼山浮圖讚

開元二十五年 今在沁水縣端氏鎮大雲寺

謹案碑前署朝議郎上騎都尉行端氏令張不孤撰

莊碑

雁門解莊書莊碑文駢麗正書圓潤純學登善銘詞

下題大唐開元廿五年歲次丁丑十月辛丑朔廿九日已巳雕鐫既畢共讚嘉聲與書人名籍並用小字旁注書人上又注董嘉義一心供養字

唐同州別駕崔禹傳碑

開元二十五年 權倖撰黨撫分書舊在潞安府

唐裴耀卿宗族碑

天寶元年 崔述撰韋若訥分書舊在絳州並見碑目

唐宋慶墓志銘

天寶三年七月 正書今在祁縣見金石文鈔

謹案碑文多殘泐其名字及敘述先世幸皆可辨略
云君諱慶字其曾祖緝荊州刺史祖則上黨縣令惟
父不事王侯隱居求志又云葬於武亭零茂村據閭
里墓志亦有葬零茂村語武亭殆其鄉名歟

唐何知猛墓誌銘

天寶七年五月 今在永甯州見碑目及金石文鈔

謹案何君名知猛字元須而文敘其家世云曾祖令
韜隋任脩化令祖開文上柱國父知猛騎都尉父子
同名必書人之誤文首悲夫作悲訣末銘曰作銘輿
曰輿二字古通訣則罕見也石於道光二十三年出
土有知州王繼賢題記

唐夫子廟堂記

天寶十一年 今在太原縣

平津讀碑記碑前題駕部郎中程浩撰朝議郎判尙書武
部員外郎琅邪顏真卿書朝散大夫檢校尙書都官郎中
東海徐浩篆額末題天寶十一載歲次壬辰四月乙丑朔
廿二日丙寅建唐會要天寶十一載二月二十八日改兵
部曰武部駕部曰司駕程浩撰此記當在二月二十八日
以前魯公書又在二十八日以後此記本刻在扶風縣文
苑英華唐文粹載浩此記俱題作鳳翔府扶風縣文宣王
新廟記後人愛魯公之書刪去扶風古縣也一段所在重
刻其見於世者有湖州華州諸石文苑英華唐文粹記末
題大曆二年某月記當是後人重刻年月編書者誤爲撰
碑年月連屬於下耳

唐刻波羅密多心經

有陰及兩側

天寶十一年 今在絳州

謹案此石正書心經其陰草書釋迦牟尼佛阿彌陀
佛等讚兩側一刻天寶十一載七月十五日一刻太
子賓客高子珍書道光中出土藏州人張學博鶚舉
家

唐襄城令鄭逞墓志

天寶十三年 今不知所在見碑目

唐智通禪師塔銘

天寶十三年 沙門復珪撰今在永濟縣棲巖寺

金石存略石久陷土中光緒庚寅經朝邑閭相國訪得始
爲掘出禪師姓張氏虞鄉人行書絕佳而碑無書人姓名

唐萬泉令裴千鈞德政碑

天寶中

唐普救寺碑

廣德二年 舊在襄陵縣見碑目

唐吏部侍郎鄭嬰疾碑

永泰元年 張楚金撰史維則分書舊在潞安府見碑目

唐鐵元始像讚並承天軍城記

大厯元年 道士胡伯成撰今在平定州娘子關老君洞
金石文鈔讚與記共刻一石其序稱張公英果絕倫雄略
冠代初則環山作城終乃宏道佐主遂精銳足巧範鐵莊
金知公之守則固戰常克皆慈衛之力也雖勿受福神其
舍諸云云所謂張公河東節度兵馬使張奉璋也舊唐書

王綰傳大厯三年綰兼太原尹北都留守河東節度太原
舊將王無縱張奉璋以綰儒者易之每事多違約束綰一
朝悉召斬之是像成不三年而奉璋且以軍法死碑所謂
受福者安在哉

謹案州志於此碑惟錄承天軍城記而略像讚不言
又誤爲李諶文山右金石志略據以著錄而以文中
有開皇大業字爲疑今考原碑乃皇六葉賊臣總燕
師者帥漁陽雜虜明指安祿山州志譌六葉爲大業
又於句首妄增開字遂似前代往事者宜爲王氏所
譏奉璋事蹟具見唐書史思明傳伯成二文合刻像
讚乃本事軍城特追記之爲鋪張功業地其末段云
公又於黃沙嶺築德化成示懷也慕容隘築沙胡城

示威也復聯建三堡絕細徑也皆有關晉東掌故者
志亦削去不錄其碑後列銜有大使特進太常卿上
柱國南陽開國子食邑五百戶張奉忠以下諸人結
銜者仿此不
具副使王丕陳遵嶠遵嶠前一行亦游弈使吳廷珍
營田副使張如珪防城副使廉明都虞侯孫希晏將
雲麾將軍于光庭張鸞子此下二行曹龍興此行官
缺其下
並缺二行名凡十七人內張奉忠下有管樂歟三字陳遵
嶠下有杞梓歟三字皆不可解伯成自署渭邱道士
蓋太原人也

薛楚玉碑

大憲六年 韓濟撰集賢學士□□書舊在絳州見碑目

邵督程元英碑

大厯七年五月 李邕撰張廷珪八分書見金石錄

謹案董氏目錄作程文英無撰人云在河津侯考

唐魏文侯師段干木廟銘

貞元二年八月 盧士牟撰趙彤書今在芮城縣

平津讀碑記水經注河水自河北城南東徑芮城二城之中有段干冢後人因建廟其地范陽盧士牟撰銘唐書宰相世系表盧士牟和州刺史碑剛作劉偃作偃避作避皆異文

案拓本趙彤芮城令舊通志作貞觀二年山右金石錄碑目並作興元二年皆誤

唐贈右僕射王謙光碑

貞元十七年 權德輿撰鄭士林書舊在潞安府見碑目

唐衡山王寺碑

貞元十七年 李巽撰羅君立書元澄篆額舊在澤州府

唐龍泉記

元和三年 今在芮城縣

平津讀碑記鄉貢進士張鑄述河東裴少微書末題順宗皇帝傳位之明年涼風至旬有五日記河東裴勣書額下又題元和戊子歲月在高藁十八日書則張鑄撰此記在元和元年裴少微書此記又在元和三年也

唐棲伽寺碑

元和六年六月 僧道明撰今在潯陽縣城東太平村

謹案碑見金石文鈔標題大樂山重修古楞伽寺碑記文記寺界至有云東至峯神廟西至礪石山南臨上馬平北據默峪澗與大樂山皆古地名之有資志乘者

唐左常侍薛萃碑

元和十五年 孟簡撰柳公權書舊在蒲州府

金石錄唐史列傳云萃父順爲奉先尉而此碑及元和姓傳皆云名順先蓋史誤也

謹案金石略作散騎常侍致仕薛萃碑在蒲州

唐報國寺泛舟禪師塔銘

長慶二年 袁允撰薛穎書今在安邑縣見山右金石錄唐振武節度使單于大都護府張維清政績碑

寶歷二年 高武撰舊在和林格爾廳北

宣室志黑山之陰有衛公廟寶歷中張惟清都護單于其從事盧立嘗夢一人頤長黑衣告立曰吾居於衛公廟且久矣子幸遷我於軍城已而遂去及曉立不喻卽入白於

惟清曰衛公於國有大勳今廟宇墜殘飄濡且甚願新其
土木之製惟清喜而可其語先是單于府以惟清有美化
狀其政績請護軍屬忠表聞於上有詔命中書舍人高公
武文其事刻於碑詔既至而未有碑石方命使採石於雲
中郡未還及修衛公廟鏟其西得一石方而長其下有刻
出張字厯然可辨工人持以獻惟清惟清喜曰天賜吾之
碑石因召從事視之立且驚且異因起賀而白前夢於是
以石爲碑刻高公之文焉

唐龍泉後記

太和六年七月 鄭澤撰姚全正書今在芮城縣

平津讀碑記太和六年夏陝虢羣牧使袁孝和禱雨龍泉
有應芮城令鄭澤爲撰此記文云太和五年秋六年春厯

四甲子無雨雖有風雪亦不及農用舊唐書本紀太和五年是冬京師大雪六年春正月乙未朔以冬雪廢元會壬子詔去冬以來踰月雨雪寒風尤甚陝號去京非遠其雨澤不同若是

唐甘泉山寺口禪和尚碑銘

太和六年十月 王攀撰并書今在文水縣見金石文鈔
唐梁春墓誌銘

太和七年十一月

卽壽陽安定梁君墓志已見前記

謹案文略云安定梁君卒於晉陽望幸里春秋享秩一十有一遷窆於壽陽縣飴露鄉段亭村莊之西巨山之南君名春字春河東節度散將驍騎大將軍試殿中監輔國之孫河東神將儒林郎試宋州宋城縣

尉季淮之子又云孝經論語通卷背文顏氏字類之
書問之便寫以十一齡童子能之亦無大異而撰銘
者直稱爲梁君以漢逢盛碑例之過矣咸年十二碑稱童子
唐石佛谷詩碣

開成元年 皇甫曙撰李道夷書今在鳳臺縣

謹案碑見金石錄曙時刺澤州石佛谷卽碧落寺也
唐黃公記

開成六年 李漢撰裴子方書今在絳州

平津讀碑記碧落文爲李漢書碑陰記其始末前題黃公
記末題開成二年十一月廿五日絳州長史李漢記新唐
書世系表譔封黃國公碑國在縣字雖泐下半尙可辨

唐盧榮望墓志銘

咸通四年 今在汾州府

謹案榮望墓在府城西北三百步石不知何時出土
書體近誠懸時雜行草文敘盧之先世引晉尙書盧
雄宿清河崔暭墳得鬼妻生子故事下卽書其祖某
殆昌黎所謂惟怪之欲聞也

唐碧落文碑側記

咸通十年十月 今在絳州

平津讀碑記文末題宏農楊墳記墳楊嗣復子新唐書本
傳路巖爲相使墳按獄黔中踰年還三遷絳州刺史題記
正其時所作

唐元宗哀冊文

史鑑八分書舊在潞安府見通志金石略

以下皆不詳年月

唐汾陽王將佐略

無撰書人舊在蒲州府

唐開元寺汾陽王像殿碑

僧開祕書舊在蒲州府

唐東川節度使李叔明冠冕頌

趙洎書舊在潞安府

唐蒲州刺史裴寬德政碑

韓擇木八分書舊在蒲州府

唐絳州刺史柳國公韋陟遺愛碑

蘇嬰八分書舊在絳州

唐薛光裔碑

陸尙賓書舊在絳州並見金石略

唐立皋陶廟碑

顏真卿書舊在平陽府見碑目

後晉栢山大雲禪院記

天福五年 今在沁水縣端氏鎮見碑目

後晉解律咸陽王廟記

天福五年 張榮撰今在沁水縣

後晉冷求開天竺路記

天福五年 李安書今在鳳臺縣並見碑目

後周龍泉禪院前後記

廣順二年 今在陽城縣

平津讀碑記前記爲澤州司法參軍徐綸述乾甯元年建
院勅額之由末題大周開基之二載歲直壬子蓋廣順二

年也記後有鄉貢進士王獻可後序述大周承祧之二祀
凡梵宇悉去無名是院以有乾甯賜額得存舊五代史顯
德二年五月甲戌詔諸道縣鎮村坊有勅額寺院一切仍
舊其無勅額者並仰停廢所述與史合

後周印法華經記

廣順三年 舊在臨汾縣見古林金石表

後周棲巖寺新修舍利塔殿經藏記

顯德六年 李崇撰張霸書今在永濟縣見金石文鈔

謹案碑後署翰忠保節功臣河中護國軍節度管内
觀察處置等使光祿大夫檢校太尉行河中尹兼御
大夫上柱國清河郡開國侯食邑一千戶張鐸建鐸
宋史有傳河朔人仕漢厯周入宋終鄆州刺史撰書

人無考瑩結銜節度掌書記將仕郎試大理司直

宋棲巖寺四至記

咸平二年 今在永濟縣見金石存略

宋玉免寺寶錄

景德二年 今在浮山縣見山石金石錄

宋折太君碑

大中祥符三年 今在保德州折窩村見金石錄

宋李將軍碑銘

天禧二年七月 今在介休縣下里侯村

謹案李將軍漢李陵也村有祠有墓蓋李氏居此者
爲之曹學博士勤云碑文駢體署前僞命省司別駕
徐贊撰前定州節度使孫鄉貢學究喬九成書學究

李化成篆碑陰題名多古村聚如板谷里侯神村水谷諸名皆邑志所無撰文之徐贊蓋曾仕北漢者故有僞命字也

宋龍潭記

乾興元年 夏侯觀撰今在鳳臺縣見碑目

宋二賢祠碑

慶厯六年 黃載撰今在首陽山見金石存略

宋萬泉縣移修文宣王廟碑

至和元年 縣令趙瞻撰并書

存略碑陰有大觀二年呂從龍從重題名二十四字

宋司馬晉州待制哀詞

嘉祐元年十月 今在夏縣溫公祠堂見金石文鈔

謹案石刻天章閣待制司馬池晚詩太常博士通判
延州軍州事馬端撰著作郎管句河東路機宜文字
雷憲書詩十二韻有注者十處雷憲書勁險絕倫當
時無書名僅見此碑

宋大雲寺額牒文

治平元年 今在武鄉縣西六十里故城鎮見縣志

宋洪崖子得道碑

熙寧九年 范諡撰許應書今在臨汾縣姑射山

存略洪崖子神山人名居敬後唐明宗召對稱旨賜爵不
受邑人張方杲姑射山記稱洞旁有碑光可以鑑唐物者
卽指是碑也金石家並據以著錄列唐碑中誤

宋重修壽聖寺碑記

元豐三年 王仲儒撰弟仲口書今在猗氏縣見存略

宋塔寺創修法堂記

元豐五年 今在芮城縣見縣志

宋耆英會圖並詩石刻

元豐六年 司馬光書今在夏縣

山右金石錄圖者十二人或行或坐或立幅巾杖履有蕭然世外之致惟溫公據案握管以方撰資治通鑑故也前有序及會約後有諸人唱和之作皆公自書小楷端謹惜多剝蝕不能得其精神耳繪者閩人鄭集此爲明天啟丙寅十八代孫露重摹有記

宋高公墓誌銘

元祐三年 今在崞縣申村見縣志

謹案石於同治間出申村渠內文爲前太原府戶曹
參軍加霖撰略言萬以豪資聞習水利事陽武河每
遇漲濱河田數十頃嘗苦墊溺之患萬鑿渠築堰引
漲水以灌瘠田得膏壤數十頃卒抵豐殖鄉人效之
知有利而不知有害云云當熙甯時朝廷求水利官
督淤田至壞民廬舍墳墓此所云引陽武漲水者亦
淤田也其創始由民自爲遂至今食利云

宋芮城縣題名記

元祐七年 張文炳撰今在縣署見碑目

宋塔寺創修法堂碑

元符二年 姚宗道書今在芮城縣見縣志

宋金繩寺塔銘

元符中 僧崇真建今在榆次縣中社村見縣志

宋堯山帝堯像記

崇甯三年五月 李挺芳撰并書今在浮山縣東八里

浮山縣志挺芳邯鄲人時爲縣丞碑字畫遒美刻工亦精

宋方山員逢謁李長者詩碣

熙甯五年 今在壽陽縣見碑目

宋新修五龍神像記

大觀四年十一月 行書今在長治縣五龍山

謹案碑爲宣德郎搢通判隆德府軍事管勾學事陳
迪撰承奉郎簽書隆德府節度判官聽公事趙士瑗
書後列銜有朝議大夫直龍圖閣權知隆德軍府事

管勾學事王完朝奉大夫權發計度河東路轉運副使公事王桓朝請耶權計度河東路轉運副使兼措置繫事崔鈞

宋勅賜神居洞崇道觀額碑記

宣和六年 知縣王伸立縣丞趙不約書今在臨汾縣授堂金石續跋碑書平陽府奏本府臨汾縣姑射山姑射洞離洞二十里有廟名姑射神人廟乞特賜名額奉勅賜姑射洞爲神居姑射神人廟爲崇道其依牒奉行在政和八年閏九月後列中大夫守右丞范中大夫左丞馮宋史徽宗紀重和元年以翰林學士承旨馮熙載爲尙書左丞刑部尙書范致虛爲尙書右丞又少宰少保魯國公則蔡京也後列年月及令丞名

宋曇延法師碑銘

宣和二年 王干撰并書在永濟縣樓巖寺見存略

謹案曇延桑泉人隋開皇時嘗應詔祈雨宋王干爲河東提舉追立此碑

朱譚積祭汾東王廟文

宣和五年 姜仲謙撰趙令疇行書今在太原縣晉祠存略
積結銜太尉武信軍節度使充河東燕山府宣撫使以禱雨有應爲報享之詞

朱勅封嘉澗侯牒文

宣和七年 今在浮山縣見山右金石錄

朱紫清觀額牒文

政和五年八月 今在芮城縣西門外

志略牒云尚書省牒保平軍紫清觀牒奉勅宣賜紫清
爲額云云後署右丞薛左丞侯太師魯國公俱有押前
保平軍奏

宋趙和墓誌銘

政和六年 裴公輔撰并書今在汾陽縣

存略石於同治間爲汾水沖出藏白庚西學博家

宋立趙襄子墓碑

大通監李隨撰今在交城縣見碑目

宋訓廉訓刑二銘

今在浮山縣署退思堂

宋翼壁古寺碑

今在平遙縣城西南題大宋姑姑之碑額篆書文同

宋打地和尙塔銘

張商英撰今在定襄縣並見碑目

宋首陽山賦石刻

蔣堂撰劉永言書今在永濟縣見縣志

遼武州龍音寺塔記

太康五年 今在五寨縣東北大辛莊見甯武府志

遼甯鑒墓志

乾統二年 虞仲文撰并書今在朔州鄆公祠

山右金石錄文波瀾意態頗學昌黎而其格近俗文中俱
官江北大約指混同江而言至於接伴宋使臣以小心得
過可見遼宋和好有推重中原共主之意非金元二世可
比也其父爲鄆陽主簿子孫因家焉鄆陽今朔州其墓在

州東四里

遼瑞雲寺碑

今在山陰縣見碑目

金摹刻司馬朴書柳氏家訓

皇統九年二月 草書今在夏縣溫公祠

謹案朴字文季溫公從孫仕爲兵部侍郎奉使於金
留不遣因得還家中州集稱其工書翰有晉人筆意
章宗萬機之暇嘗購其遺墨學之云云此乃所書柳
玘戒子弟語僅一百三十餘字其子作爲摹刻於石
後跋云先公侍郎手澤以戒作通俾終身行之今不
敢忘謹摹於石子孫其永保之己巳春卅六日男作
泣血記不書國號殆卽陶靖節義熙後但題甲子之

意歟

金重立司馬溫公神道碑記

皇統九年六月 王庭直撰王昭書今在夏縣

謹案庭直爲夏縣令得原碑拓本於司馬作家乃分爲四石摹刻之合碑額及跋尾爲六石於墳院別築室嵌之壁間此記卽末一石也中言作及弟通方冒暑毒焚舟決戰於雲燕之間未回考是時南北罷兵疆域晏安雲燕爲金中京西京地所云焚舟決戰者竟不知爲何事也

金興福寺重修大殿三門記

正隆元年 張忱撰僧福崇書今在汾州府見碑目

金重修天龍寺銘

正隆四年 智允迪撰任臬書今在太原縣見碑目

金稷山縣康樂亭記

正隆四年 縣令張陞撰今在縣署見金石存略

金古彌勒院記

大定二年 毛麾撰并行書今在臨汾縣東上陽村

金太清觀牒文

大定三年 今在猗氏縣城內

存略觀東西壁石碣二其一刊本縣給只存乙卯年字

金勅建大覺寺碑

大定五年 張仲全撰并書僧宗海立石今在岳陽縣南

二里並見存略

金萬卦山詩碣

大定六年 史口撰今在交城縣見碑目

金隴西李口墓誌

大定十一年 賈圻書今在安邑縣見碑目

金重修馬莊武王廟殘碑

大定十一年 今在猗氏縣見存略

金康澤王廟碑

大定十一年 毛麾撰黃仲庭書今在臨汾縣龍子祠

金遼州文廟碑

大定十四年 軍事判官鄭元撰並見存略

金建關大王祖宅塔記

大定十七年 今在解州東二十里見碑目

金李氏園詩碣

大定二十六年 喬展撰并書今在洪洞縣見碑目

金冀氏縣文宣王廟碑

大定中 今在岳陽縣南一百三十里冀氏村

存略碑在村之觀音閣冀氏縣令李忠翰撰進士蔡賢書

金重修女媧廟碑

明昌元年 胡文棟撰并書今在靈石縣南關鎮

金摹刻唐御製宸展台衡二銘記

泰和元年 今在猗氏縣馬莊武王廟

謹案二銘本馬燧守北都時德宗所賜者燧刻於太原泰和初道士杜道晦得拓本因摹刻於此而主簿梁德裕爲之記鄉貢進士薛繼先書之其宸展銘亡於明時今惟存台衡銘及記繼先字曼卿號州人金

史有傳書法平原頗可觀也

金天壇三清廟碑

泰和二年 段時可撰李彬書今在猗氏縣見碑目

金華州防禦使武威郡侯段鐸墓表

泰和二年 張萬公撰今在稷山縣平隴村

授堂金石三跋表書段鐸歷官事迹最詳審考鐸於金史無傳惟附見梁襄傳曹州刺史段鐸薦襄學問賅博練百典故者是其人也今約舉碑所稱鐸字文仲與兄鈞同游場屋都人呼稷山二段正隆二年登進士第五人第調長安簿守絳州絳縣職滿除天德軍節度判官移宰耀州繼宰涇陽改充尙書兵部主事授同知棣州防禦使事復被命審決河北路刑獄事除中都勑務起授大名府治中兼

本路軍馬副總管尋授曹州刺史移鎮平定未幾徙節授
華州防禦使懇求致政躋進兩階授中奉大夫加護軍武
威郡開國侯增邑三百戶食實封一百戶俸祿仍給其半
以泰和元年五月歸里是年十一月卒蓋鐸所居官皆有
實驗爲當時所稱而在棣州時河決滑衛間故相劉緯辟
督工役按之劉緯傳何決於衛自衛抵滄皆被其害詔
兼工部尙書往塞之與碑文合緯有幹力其所辟如鐸者
洵亦賢矣

金岳陽縣赤蓋令尹遺愛碑

泰和四年 王度撰并書今在大覺寺

存略文刻大定五年大覺寺碑陰赤蓋下缺其名

金首陽山弔夷齊詩碣

泰和四年 王仲通撰並行書今在永濟縣

金嘉祥顯濟王廟碑

泰和四年 今在沁州西三十里伏牛山

沁州志碑前署銅甃進士段人常思初撰并書後書泰和四年歲次甲子八月辛卯朔十有五日乙巳段人常思溫立石舊志以段人常爲姓名誤

金芮城尉紇石烈昭信德政碑

泰和六年 許安上撰楊處仁書見縣志

金雙榆社碑記

泰和八年 栗希孟撰今在襄垣縣見縣志

金襄垣義冢記

泰和八年三月 栗希孟撰今在縣東門外見縣志

金重修姜源廟碑

太和中王藻撰今在絳縣南三十里存雲嶺見存略

金亢泉更名碑

有陰

貞祐五年碑陰興定二年今在臨汾縣東亢村

存略亢泉卽湧泉在縣東南二十五里碑前署府學正堂柳德榮書臨汾縣令孔祖湯立石陰記河東行省禹門李革君美因觀稼來此廟前一泉澄澈可愛俗謂之深泉以其名不雅馴因其地改名曰亢泉從行者行六部尙書潁川張穀伯英宣差參議翰林直學士常山李尤魯暉德明同知總管遼陽完顏盡忠進之等末署穀書

謹案貞祐五年卽興定元年也李革張穀金史並有傳革河津志作華五臺志同以字君美證之似不誤

而此碑作革與本傳合或初名華後更名革歟碑立於興定二年是年十月元兵破平陽革以身殉張穀已前卒碑爲所書亦僅見者歸潛志稱其字畫古勁有平原風信然

金贈榮祿大夫樞密副使王晦碑

舊在高平縣

金史貞祐中順州受兵晦被執不降死事聞贈官命有司立碑歲時致祭

金忠武校尉任德懋墓碣

蒙古壬寅 元好問撰舊在汾陽縣洪哲里見遺山集

元太平縣重修文廟賢廊碑

至元十年 王惲撰并書

金石存略 憚結銜前翰林院修撰監察御史陞承旨郎平陽路總管判官篆額者經歷田伯英也

元重修岱嶽廟碑

至元十一年 鄉貢進士白琇書今在鳳臺縣治底村見存略

元首陽二賢祠碑

至元十一年 王憚撰王博分書今在永濟縣見山右金石錄

元棲巖寺碑

至元十一年 陳賡撰王憚書今在永濟縣見金石錄

元姜文卿晉祠留題詩刻

至元十九年三月 姜或撰張維正書今在晉祠

存略至元壬午或爲河東山西道提刑按察使因觀水利
謁祠題七絕四首浣紗溪詞二闕九月來賦鷓鴣天二闕
次年上已重游題五律一首書人爲經歷張惟從行者有
前嵐州知州平晉尹魏章書史王中權秉中諸人
元雁塔寺聖旨碑

至元二十二年 今在猗氏縣見存略

元重修康澤王廟碑

至元二十三年 張著撰岳世安書今在龍子祠

元知石州高岡墓碑

至元二十六年 胡祇遜撰王博文題額今在甯鄉縣北

元藏山寺碑

至元年 今在平定州亂柳村見李兆勛承天訪古記

元重修康澤王廟碑

元貞二年五月 曹輓撰林思問書今在龍子祠

元洞神宮記

大德五年 郝毅撰并書今在稷山縣見存略

元棲巖寺中書省牒

大德七年 今在永濟縣見碑目

元宣差橋船都總管疏

大德九年 今在永濟縣見碑目

元開河寺碑

大德中 今在平定州亂柳村見承天訪古記

元復建岱嶽行祠記

皇慶元年三月 續執中撰賈之美書今在翼城縣見存

略

元儀氏先塋碑

皇慶二年 今在解州西北十六里侯村

存略翰林侍制陳學撰高郵知州儀叔安立

元后土廟增置地畝碑

延祐三年 今在猗氏縣城西見存略

元平西侯李公碑

延祐四年 今在太谷縣東北四十里東里村

太谷縣志碑題亞中大夫輕車都尉河東山西道宣慰

使平西侯李公不詳何名

元岳陽縣新修廟學記

延祐五年 續執中撰見存略

元字允魯晉祠詩碣

延祐五年

石抹思誠正書今在晉祠勝瀛樓

元路學錢糧記

有陰

延祐五年五月

張思敬撰并書今在平陽府學

存略碑敘廉訪使張景魯贍田覈租與教授李從恕興學

事陰記田畝米豆之數

元同知八番順元軍民宣撫司霍子萬先塋碑

延祐七年

李洞撰今在定襄縣西邢村

定襄舊志霍去病墓碑文一千四字銘一百七十六字

延祐癸未前翰林國史編修官李洞撰碑內切要及所

敘流派名字殘毀始盡大都去病後代子孫宣撫君功

成之後刻石祖塋一以彰先人之舊一以昭繼述之光

文有云定襄今忻州所屬邑其族數百人以東西小
霍自別又云五里名西興里爲塋冠軍則世有廟祀蒙
下案叢蒙山一名蒙尖山舊有雨霽侯廟相傳爲去病
碑世有廟祀蒙下毀二字必爲尖山無疑其曰西興里
爲塋豈古西興卽今西那也

謹案霍君子萬碑缺其名文敘家世溯始冠軍援漢
書出兵定襄爲證然漢定襄郡自在塞外霍氏聚族
於斯虛建祠墓本事之常而遽指爲歸骨所在則傳
合之謬也撰文之李洞勝州人箸有概之文集志云
李洞誤

元重修薛仁貴廟碑

延祐七年 薛恭敏撰并書今在河津縣黃村見存略

元漢泉聖母廟碑

至治二年 房希文撰許有駿書今在臨汾縣東亢村

元建明陽觀碑

至治二年 薛天輔撰今在榮河縣南關

元姚忠肅公議謚碑

至順四年 今在稷山縣南陽村觀音堂

元稷山縣文廟古銅祭器碑

後至元元年 段秉昭撰梁周文書並見存略

元左丞李彥古墓碑

後至元元年 今在應州見碑目

元靈泉寺禱雨碑

後至元元年 趙承禧撰何約書今在東亢村

元棲巖寺請師疏

後至元五年 今在永濟縣見碑目

元晉甯路復建夫子廟兩廡碑記

後至元六年 續執中撰田九嘉書今在府學見存略

元重修法隆寺碑

至正二年 教諭李本撰僧行願書今在沁水縣東關

元靈石縣靜昇村廟學碑

至正二年 張允中撰縣尹冉大年書

元絳州重修夫子廟碑

至正二年 賈魯撰并書

元絳州新建鼓樓記

至正三年 賈魯撰并書知州李榮祖立石

絳州志魯書取裁於晉而氣骨蒼穩絕去近世佻巧之習昔人謂元人書法復古信然

元潞州知州張奉儀創鑿龍井記

至正四年六月 今在長治縣五龍山

存略碑爲翰林待制王理撰宣文閣監書博士周伯琦書禮部尙書王守誠篆額伯琦正書類趙文敏張奉儀鑿井禱雨事府縣志錄其五碑頗譏其好名而不知者尙有此碑也

元姚文獻公龍池詩碣

至正五年 王士元書今在臨汾縣龍子祠

元康澤王廟禱雨碑

至正五年 王士元撰王好學書達魯花赤朶羅文立石

元端雲觀碑

至正八年 張寬撰張孝先行書今在靈石縣

元慶壽寺碑

至正九年 王士元撰今在襄陵縣東南王村

元龍子祠禱雨碑

至正九年四月 教授張昭撰王士元書李維善篆額

元重修普應康澤王廟碑

至正九年八月 陳克敬撰段庸書並篆額

元晉源山水詩碣

至正十年六月 王士元撰并書今在龍子祠

元重修羅漢院記

至正十二年 段曷撰段訥書今在浮山縣並見存略

元萬卦山野雲行業記

至正十二年 郝忠撰今在交城縣見碑目

元段承相墓碑及泰安州知州段希義碑

至正十三年 今在洪洞縣南十里馮張村見存略

元上喬村廟碑

至正十三年 段義撰今在洪洞縣南二十里

元三靈侯歷代封號記

至正十四年九月 今在稷山縣城並見存略

元資政大夫司農鄭允中先塋碑

至正十口年 翰林承旨趙孟祚撰今在石樓縣南五里

元廉將軍廟壁記

至正二十年 段承祚撰並書今在稷山縣廉城村

元太平縣重建夫子廟碑

至正二十一年 郭晉撰縣尹馮鈞篆額尉趙元善書

元興修上官河水利碑

至正二十六年四月 今在臨汾縣龍子祠

存略承務郎少僚府長史前翰林院國史館編修官楊統
撰張守文書後列推官仲思明董珍判官傅忠程源治中
撤都議理刑部尚書熊載諸名守文洪洞人書頗秀逸

元重修靈淵侯廟碑

至正二十八年 王安良撰今在嵐縣大萬山

元壽聖寺呂左丞詩碣

至正中 呂思誠撰今在平定州移穰村

元絳陽軍節度副使郭子通德政頌

今在絳州見碑目

元李留守墓碑

今在洪洞縣城東一里

元廣裕大師道行塔銘

趙孟頫書今在稷山縣並見碑目

元修成湯廟碑

何世祿撰今在祁縣紫紅鎮見存略

元建鎮署碑

今在神池縣利民堡玉皇廟見存略

右碑碣

後魏開河寺摩崖題記

永平年 今在平定州亂柳村

承天訪古記石在大像之右摩崖刻文後題名數行陷壁中前有佛立石上石三面刻殘泐特甚有永平字知爲魏物

後魏贈代郡太守程哲碑

天平元年 今在長治縣袁家漏村

謹案此碑於近年始經人訪得摩崖刻高四尺許字三十二行行四十五字楷法勁整惟結體甚小磨崖刻艱於運刀鋒鋸少鍛而完好僅缺數字殊可貴也其文則支離雜沓漫無體裁不能以金石常例繩矣碑額題大魏天平元年歲次甲寅十一月庚辰朔三日壬午造訖歲月書額唐貞觀晉祠銘以前此爲僅見其下首行題假恒農太守程定宗詔假常山太守

程文靜前祭酒輕車將軍程海珍假太原太守程蓋
世程進程慶仲等造第二行題朔州故平北府長史
程鉢字洪根故晉陽令程蠡字士璉故高都令程買
字市略故贈代郡太守程府君之碑文標目述及同
族名字並書金石中尤爲創見也文稱君諱哲字子
賢上黨長子人器識融通狎素淵雅論經則通并於
四科語典則幽達於賈馬揮翰風生吐章落玉孝等
曾閱義同柏山又善弓劍便於騎射彎弓十石矯矢
猿號養由碑作遊蒲盧蔑以加也又云振羽霄霞考槃
雲室高扳人表獨悟世里蓋才兼文武賢而隱者也
其敘家世溯始商周系出程伯以程嬰爲遠祖次漢
程不疑次魏程愔與弟昱皆於史有徵以下則爲晉

豫州刺史山陽侯雄浮氏令猛上黨太守豐豐弟後

趙司徒公暇而豐實始居上黨豐生七子

七子與文內趙太和

七年七皆當爲二之誤

蔭元氏令稚白馬令魏郡太守並仕於

趙稚生五子綆代郡太守貴鄉侯景絕後洛廣年中

牟二縣令陽容城令周常山太守皆仕於燕而周卽

其高祖曾祖蒲始仕魏爲武安令三子芝高都令信

假魏郡太守韓假趙郡太守則敘止祖芝而不及父

又標目之程鉢程蠡程買亦不復敘及而文後別爲

三頌一題故贈代郡太守并息贈陳郡太守程永之

頌詳頌詞卽哲與其子也一則蠡並二子廣平太守

靜光假西河太守次等一則買並其子贈太原太守

義而獨遺鉢無所述凡此諸人與造碑之程文靜等

六人亦竟不知與哲屬何輩行也至若敘程氏所自有云伯苻以英才桀出作卿相於成康休父以鑒明洞悟乃光隆於周室伯苻無可考據唐書宰相世系表言重黎之裔孫封於程是爲程伯至宣王程伯休父失其官守以諸侯入爲王司馬云云則所謂伯苻在成康時或卽封於程之程伯耶要必有據不得以不見古籍遽謂無其人也惟謂晉平公封程嬰爲忠成君漢武帝以程不識爲并州刺史霸城侯皆不知何本若爾則後來趙宋之封程嬰爲成信侯公孫杵臼爲忠智侯特襲舊號而刺史專制不自後漢霸城置縣亦不始西晉矣三代無追贈官爵之制漢武初秩六百石治無定所地理志無霸城縣晉志始有此縣屬京兆郡其他自程昱外雖

不見史傳及姓氏書要是實錄程氏世爲潞著姓康熙中程大令正續嘗輯上黨程氏乘餘錄以補郡志未備其子之珩復有續錄又著程氏人物考搜探可謂勤矣而此碑近在境內其有關於譜牒甚鉅徒以山崖幽僻竟未一覲物顯晦有數信哉

東魏紅林灣佛龕題記

元象元年 今在平定州移穰村見承天訪古記

魏齊三佛龕題記

今在平定州亂柳村西

承天訪古記中龕正面佛像五左側佛像三右如其左下層皆有題名記刻於龕之肩東魏武定五年也有龕最大北齊皇建口年造記亦刻於龕之肩龕內正面佛像五左

側佛像二右如其左下層亦有題名左龕制如前二龕北齊清河二年造龕內佛像題名式如前中龕右龕之間復有造像二一爲皇建二年一爲河清二年皆有記刻於像之下層龕皆爲石門門已亡僅存石坎其迹若可啟閉者北齊李清報德像碑

卽李清造像記已見前卷

厚齋文集此碑在平定州東四十里石門口磨崖正書三十行行四十一字曹秋岳古林金石表始著錄謂之石門口寺碑寰宇訪碑錄有此碑目而行下地名則缺之案碑爲鄉郡鄉縣李清報趙郡李憲李希宗父子二公之德而造李憲北齊書無考希宗爲文宣皇后之父見后本傳北朝自魏太武造新字其見於石刻者臆書破體不可殫舉

此碑爲燕州釋仙書書法嚴整古拙是北碑正派而其人
不通文語動筆輒誤非爾時書體然也如造像人李清首
行作李清第三行以禮待青青德乏故賢二名俱無水傍
此必有一誤憲官充雍七兵尙書陽冀定五州刺史魏齊
間河北諸州無置陽州之事反復推究陽蓋易字之譌若
五行簡易可久第二十九行驟騎易往易皆第
作易則由魏齊間易易二字率不分別也又此僧自署
燕州考魏太和中曾分恆州東部置燕州孝昌中陷天平
中於幽州軍都城置東燕州北齊州廢置東北道行臺此
僧究生何時所產何地乎古人列街書郡書縣無書及州
其僞然似不可柏人漢志以下無異文卽北齊李渾諸人
執以例此僧也傳亦作趙郡柏人元和志曰後魏改柏人爲柏仁隋志襄
國郡柏仁校者仍據漢魏地志改仁爲人今此碑正作柏

仁可以訂校者之矣矣又云永甯鄉陰灌里人也兼詳其鄉里之名蓋放史記高祖本紀之例清以文靜文簡薦拔得奉朝請感其德至於去家五百里就邢邢開榆交戎磨崖刊石造此像碑邢疑邱字邢邢謂井陘開榆謂榆關也鄉郡爲今沁州武鄉去吾州石門口正五百里往來晉陽鄴中所必經故碑云萬里萇途百州路側也首行年月日鄉郡李清言是奏書朝廷之式而銘曰爰有宗人老成夙惠則製銘者別是一人碑中壞字如扶作扶朽作杉兩標作櫛盡作蓋質作質猶作猶嗣作嗣葭作葭梁作梁序作序微作微之類甚多凡魏齊間習見俗書概不出又有譌文如負土城墳當作成墳石柳張炭當作張灰職二三界職二二字不解惟此公二當作二公瞬息二不留次息字二點當是之字讀碑者以小字正書二點之下

又有脫文如波輪迴星流電滅波下脫一字戶改詞曹門
通德門下脫一字功大造推心宏濟功上脫一字滄海爲
原下當脫一句火垂於華想脫華字淵實工又碑首天
保六年歲次乙亥七月己卯朔一日庚辰一日上當有越
字考之本紀是文宣頓軍白道率輕騎五千北追茹茹時
也又銘文惟彼調御句彼字下忽空一格草率若此蓋不
僅張遷既且從畋之比矣此古人所以並重察書也此碑
自來無考訂及之者以吾州石刻更無鉅於此故詳悉著
之

謹案廣韻邢邢地名卽指井陘碑作邢邢正同邢卽
邢之繁文也文中職二三界與上句擾擾四生相儼
此二乃職之重文非數目字

北齊磐石關口佛龕題記

武平四年 今在平定州北上磐石村

承天訪古記上磐道至關觀武平造像石龕中佛像三龕
旁方石柱二左柱記文四行石柱題名多漫漶左柱之左
復有摩崖高二尺餘廣尺許上有小佛下皆題名未完又
於左柱之左側續題之字皆可讀

隋教戒經摩崖石刻

開皇十三年 正書今在靈邱縣東南千佛堂

謹案石前題佛垂般涅槃略說教戒經其上題字二
行云龕主定州城內賈丹母蘇爲七世先亡現在眷
屬法界衆生供養下有趙常題名經文約二百八十
行行三十二字又佛名八十七行後書龕主祖周使

持節少師大將軍延綬丹三州諸軍事延州總管贈
青齊濟兗膠五州刺史蜀郡開國公伯儁父金州刺
史仲義孫定州司兵參軍事韓長末署年月無書人
名字間雜隸體古勁有姿自來無著錄者

隋開河寺石壁題記

開皇中 今在平定州亂柳村見承天訪古記

唐錦屏山摩崖石刻

開元九年 王異八分書今在吉州見山右金石錄

唐承天山裴晉公摩崖題記

長慶元年 今在平定州娘子關

承天訪古記翌日登承天山步行至老君堂少憩訪裴韓
二公題名道人引至旁殿後則裴晉公題名在焉摩崖刻

西南向高二尺許寬丈餘文左行題名四十六人共五十九人永舒元輿題記七行有長慶元年秋七月趙人亂及冬十月師次於承天云云後復有記二行題名四行共四人蓋晉公之弟與舅從他府來並其二子繼題於後亦舒君所書也

、謹案舒元輿唐書有傳此碑古林金石表曾著錄

唐承天山韓文公摩崖題名

長慶二年

承天訪古記韓文公題名在旁殿左側亦摩崖刻高廣僅尺許土花斑駁中隱隱有公及吳丹名掃以帚拭以巾得文五行長慶二年二月也裴韓二公題名雖非一處然固是一石後人於崖前起殿宇斜界以牆遂橫分爲二殿側

人跡罕至竟無知者

謹案吳丹字真存八九歲能詩公壽陽驛題吳郎中詩後卽其人趙明誠金石錄有華州新廳堂記爲丹撰并書此書未審卽丹所作抑公自書也

宋樓子山摩崖題名

元祐中 今在甯武縣南六十里

甯武府志山崖題云元祐

缺

年秋七月己卯文思副使

知甯化軍事太原王餘應定山與前朝奉郎通判軍事

汝南趙審同遊樓子山飲於漏崖之足以觀汾水之源

爲安懿玉玲瓏之琴以撫秋思之弄旣闕而奏雪中松

之曲是行也吏部劉喜王錫魏廓陸思誠鞏裕李昌言

狄球榆次尉石伯倫預焉洛陽鞏裕書

宋錦屏山張道益等及魏伯文摩崖題名

政和四年一八年 今在吉州

宋錦屏山石壁詩刻

宣和三年 張述撰并書並見碑目

宋出佛峽摩崖大字石刻

今在趙城縣西四十里羅雲山

金石存略米書第一山三大字石墨鏤華云凡二處一在
盱眙一在盤屋此不知何時摹刻款書米芾書其左右又
刻有聯云嵐封峽口雲無着月到潭心影不流年月書人
均模刻莫辨

洪襄山石壁篆文

今在遼州東十五里

張惟渠洪甕山記山上棲真洞石壁有古篆磨滅難識

右摩崖

唐總章經幢

今在臨晉縣署東後寺廡下

臨晉續志幢石既殘缺字亦剝落經末署總章年號知爲唐代物知縣錢官俊有記

唐石佛寺陀羅尼經幢

永昌元年 今在虞鄉縣南三里寺中見金石存略

唐開元經幢

今在陵川縣署近年出土見存略

唐金剛經幢

開成元年五月 今在澤州府明道書院

王允楚唐石幢記澤州刺史皇甫曙書金剛經其字雖多
漫漶而筆意含蓄書法實工在唐碑中亦錚錚者道光丁
亥得之郡城北樓高臺寺土中

後晉張彥美經幢

天福五年 今在沁水縣見碑目

宋雁塔寺經幢

建隆三年 今在猗氏縣見存略

宋承天山石幢

乾德五年 今在平定州妒神祠見承天訪古記

宋佛頂尊勝陀羅尼經幢

政和元年二月 今在稷山縣關廟

存略幢高三尺許六面刻有篆書佛

缺尊缺

陀羅尼經幢

九字其經呪多剝落惟年月尙可辨

宋天王樓經幢

今在猗氏縣天王樓下

存略幢書佛頂尊勝陀羅尼經年月並泐署銜有朝議郎
賜緋魚袋周太素十一字當是宋時物

金壽聖寺經幢

皇統四年 今在平定州移穰村見承天訪古記

金陀羅尼經幢

正隆四年三月 今在稷山縣三靈侯祠見存略

金白雞山二百幢

大定中 今在平定州龍莊村

承天訪古記一在白雞寺故址一在山半龍王廟

金文悟大師功德幢

承安五年 呂琢書僧惠璉建今在洪洞縣城北見存略

元藏山寺石幢

至元口年 今在平定州見承天訪古記

元東神山岳廟石柱詞刻

至正二十一年 今在蒲縣東五里

存略廟中石柱刻木蘭花詞五首縣尹邢叔亨撰並書小

楷極工

元老君堂石幢

至正中 呂思誠刻今在平定州盤石村

元鐵佛寺經幢

至正中 今在平定州東口村

元木櫺寺石幢

今在平定州盤石村並見承天訪古記

右幢柱

東魏天池石記

興和三年 舊在甯武縣南

隋書五行志齊神武至天池獲瑞石隱起文曰六王三川

唐衛大經墓石記

開元二十二年 舊在安邑縣

宣室志衛先生大經墓於解梁之野開元中姜師度奉詔鑿無鹹河剡室廬墳墓甚多既至衛先生墓前發其地得一石刻字爲銘蓋先生之詞也曰姜師度更移向南三五步工人得之以狀言之於師度師度異其事歎詠久之

顧謂僚吏曰衛先生眞奇士也卽命工人遷其河遠先生之墓數十步

唐深州刺史墓志蓋

篆書今在汾陽縣

碑曰石不知何時出土原志已佚僅存其蓋明人鑿爲金牛禪師塔碑趺

唐處士張君墓志蓋

篆書今在汾陽縣

唐吳道子南極老人像石刻題字

今在絳州並見碑目

唐無名氏詩刻

舊在蒲州府

彦周詩話嘉祐中河中河濱漁人網得一小石刻詩曰雨
滴空階曉無心換夕香并梧花落盡一半在銀牀不知唐
時何人所作

宋晉祠銘碑側題名

今在太原縣晉祠

謹案碑左側文四段一爲元祐己巳曾布移守真定
謁祠留題五行吳則禮正書一爲至和二年邢佐臣
余藻題名三行行書左行一爲元豐七年呂升卿留
題行書六行亦左行其下六行正書字差小爲紹聖
四年王修再新廟宇偕督役諸人同記右側文二段
一爲熙寧戊申王安禮楊世昌張仲咨題名四行一
爲前知豐州馬仲良同都巡檢使李洵謁祠記文四

行行書末署壬戌歲孟春無年號當是元豐五年也
其碑陰宋人題名已附見唐碑下今檢拓本尙有元
豐七年府通邢平陽曲令崔衮行書四行前記偶遺
宋黃叔敖許端卿題名

今在陽城縣東三十里海會寺見金石存略

宋蘇東坡詩刻石

今在永濟縣萬固寺見碑目

遼武州石表題字

今在五寨縣見甯武府志

元解鹽司判官鄭榮題名

今在安邑縣池神廟見碑目

右石題

後魏董成國造像記

正光四年六月 正書今在絳州張氏

金石存略光緒戊子龍興宮故基出土石裂爲四前署幢主雅衣高邑董成記文多殘闕可辨者一百餘字記後題名董姓爲多

東魏豐樂寺造像記

興和三年十一月 正書今在平定州

謹案碑舊無著錄者近爲李汾生太史訪得豐樂寺比耶尼員光門徒弟子所造小記五行刻石左側右側題名五行額兩側亦題名其著官秩者有太原太守王合興長史邢延歡太原守郭勝新興祁功曹邢伏興瀛州刺史邢延護并州刺史趙榮周肆州主簿

馬道富諸人瀛作嘉興記中轉輸作倫並譌文

東魏李伯奴造像記

武定二年 今在平遙縣見金石文鈔

東魏張保洛造像記

武定七年 今在絳州張氏

平津讀碑記碑前題張保洛劉襲薛光熾三人結銜皆稱
東雍州魏書地形志東雍州世祖置太和中罷天平初復
後周改爲絳州張保洛北齊書有傳碑結銜皆與傳同唯
不言東雍州鎮城保洛本由齊神武起家碑云敬造石碑
像四佛四菩薩仰願先王樊太妃大將軍令公兄弟等亡
者昇天現在眷屬輔相魏朝永隆不絕先王卽神武妻太
妃卽神武妻后大將軍卽文襄令公卽文宣魏書孝靜紀

武定七年八月辛卯齊文襄王薨碑立於武定七年二月八日是時文襄尙存

謹案碑爲洪氏箸錄後不知何時復湮入土近歲始自龍興宮掘出與正光碑並爲張學博鶚舉所藏

西魏老子祠造像記

大統十一年 今在芮城縣蔡村鄭姓家

縣志碑額有像三下橫列趙光初五年冠軍將軍關內侯平陽太守豫州刺史太尉公蔡洪像一區碑石完整字多鑿損形體尙可辨識敘蔡氏遠祖官爵暨遷居河北造老君祠祈福云云字畫微帶八分

北齊邢多等造像記

天保二年 今在孟縣北

存略是碑僅見裝本文有曰邢多五十人等皆因封而居
子孫留寓今在肆土爲人領袖又曰遂在各州發宏大願
令軍旅行還建敬像一區後署天保二年歲次辛未七月
壬申朔十五日丙戌定襄縣佛弟子邑儀等又題名六十
二人有維那邢阿多邑主邢惠貴等凡邢姓居半似卽在
定襄之邢村

北齊九級塔像記

天保三年 今在大同府見碑目

北齊江阿歡造像記

天保六年 今在陽曲縣見碑目

北齊武平造像記

武平五年 今在絳州署中

存略石於近歲出州署中題名有鎮遠將軍龍陽令李缺
及募主楊遵善化主楊訛楊僧和等名

北周興國寺李早生等造像題名

有側

今在安邑縣見碑目

隋張仲修等造像記

開皇五年 今在翼城縣北十方院

存略石已中斷像下小記有曰像主張仲修又曰以開皇
五年歲次乙巳四月丁亥朔八日甲午弟子張仕甯張
敬造石像一區餘多剝落陰及右側列家世爵里亦殘缺
莫辨

隋道民蘇遵造像記

開皇十七年六月 今在永濟縣常姓家見存略

唐梁仵期造像記

麟德二年 今在洪洞縣董氏

唐阿勒陀像碣

周萬歲通天二年 今在稷山縣城觀音堂

存略碑上半已缺毀所列信女十七人皆刻像題姓氏未署年月

唐韓守足造像記

開元十九年 今在臨汾縣西三十里土門村普照寺見存略

右造像

宋東嶽廟碑集石軍書

今在定襄縣南二十五里東霍村

已見前記

謹案碑標題大宋國忻州定襄縣蒙山鄉東霍社新
建東嶽廟碑銘并序下署太原王鼎譔兼集晉右將
軍王羲之書并篆額後書大中祥符九年十一月廿
四日建立末一行別爲正書有知忻州胡令儀及通
判李珣推官趙億銜名王鼎館陶人宋史有傳碑序
銘皆不甚工集書近褚臨本特少疎朗之致據本傳
鼎登第服官當在天禧後此爲少作故但署郡望

又案集書爲前人著錄者有唐貞元九年上柱國梁
思楚碑衛秀集右軍書見寶刻類編前記據墨池編
以爲開元十五年衛秀書又據平遙縣志別列梁思

墓誌銘似本一碑

志云自墓中奔出今存吉祥寺然

趙明誠已著錄非近代始出而趙

書已兩見一云開元十五年郭翥撰

梁思楚集右軍書平遙志則並

撰書人不詳非得拓本無由別其是非也又宋明道二年王冕淨居詩沙門靜萬集右軍書見金石萃編前記據舊通志祇詳撰人不知爲集書也茲並補正

元西溪法帖

高肯堂摹刻見高平縣志

元進學解石刻

鮮于樞書舊在太原府見碑目

晉府崇理帖

篆書朱俊格摹刻

舊通志俊格靈邱王聰漏子也好古篆籀手摹六十餘

種勒石

舊志人物又作崇經帖

石法帖

元分置芮城縣治塹記

元貞元年 今在縣署

縣志明嘉靖中增修縣堂撤舊垣得元輒記二方記至元三年併縣合於平陸元貞元年復分置事是年十月再修縣廳末署達魯花赤塔海縣尹郭在主簿李誠典史秦忠

諸葛武侯廟塔塹記

舊在榮河縣天興村

縣志武侯廟中有塹塔居人議毀之有駒兒者首壞其一隅內有記云若是塔兒破定是駒兒來乃復爲整理如初

右塹瓦

謹案諸家著錄惟高郵夏氏山右金石錄有槧本王氏志略董氏碑目皆草創未定前記僅見王氏原稿采以入書剞劂既畢始得夏董兩家本復有以祁縣何氏遵先山右金石文鈔臨汾宋氏琦山右金石存略來者徧加檢閱益以搜采所及凡爲前記未收者至二百七十餘種乃依原目輯爲補遺一卷其有前記已列後見墨本誤者亦附訂焉當夏氏輯錄時以晉人舊無專書頗自矜慎而搜訪廿年僅得百有二碑又誤收者五今再期之間所獲竟十倍過之則因取材之備追思創始之艱諸家蓋皆爲其難矣然近時有訪碑平定山中者信宿中獲古刻二十八皆世所未覩由是推之全晉深谷閭崖沈湮者何可勝數

而後人所見必且益廣於今其以是書爲椎輪者又
何可限量也